

2TI -

2 Timote

Bələ nii sagı tə, Polə nə púpúní v pa

Timote

nə

Timote bələ nii sagı tə yuu wa sugu

Lìù tə, v nə púpúní sagı ku tə

Ku yı *tuntunu Polə nə púpúní ku. Máná tə wa, v nə púpúní ku, də v yı v wulə bání diè wa Romə nə. Ku yın càn zənzən ku pa wá. U mu ya bwələ, sə ku zwè, yá lùù də yà təlá, sə v san v nə.

Lìù tə nə, Polə nə púpúní

Sagı ku yı bələ nii sagı tə, v nə púpúní v pa Timote nə, v nə yı v tutundon, v ga swə wá zənzən.

Sagı tə wa sugu

Polə təntən v kəni Yu lèè Timote yırı. U dān swìn Timote con, sə v zıgı diàn v tun Yu tutuŋı tə zəni də yawala, də lià nə swə ba kəni càn v nə, ku tutuŋı təntə yırı. U tə swìn v con, sə v cì lià tə nə, ba nə di tútùná tə nə ba dèñ jə, tə nə ba saŋa, sə lià tun Yu tutuŋı tə. U swìn Timote con, sə v ya ndə v mù Polə yà nə yı nətu. U me, sə v twá cígá tə nə, sə v kə v waa Zwezi nə wuuu, sə v sóní lià, sə v ja pínú, sə v dān ká swèé kàrà nəzəŋu tə, ba nə kàrì wá.

Sagı tə yígúré wa, v bırı nətu v tətə nə dí càn, də nətu tə Yu nə san wá.

1

Polə jùnì Timote

¹ À mò Polə, yì Zwezi-*Kərisə *tuntunu. Ku nətɔ twá də Yu fira tə. Zwezi-Kərisə tun nə, sə à swìn mu tə yoo là con. Yu kàn nii də, ɔ wá pa ku mu təntə là tə nə, ba nə vwə ba tìàn Zwezi-Kərisə yura. ² À púpúní sagi ku tə, à pɛn n mò Timote nə. N yì à bìú tə, à nə swə zənzən. Nə nyina Yu də nə *Yuu-Tiu Zwezi-Kərisə nə wá fwa pubwanu n yura. Ba mò nə wá dəri n yinəgə zənzən, ba ga pa mú bican sǐó.

Polə dàn Timote jìàn

(Tutɔnan 16.1-3, 2 Timote 2.1-12, Efɛzə tìàn 1.3-7, 2 Tesalonikə tìàn 2.13-15)

³ À mò Polə kəni Yu lèè, à pɛn n mò Timote nə. À lòrì Yu də bican nəpon, ndə à nɪbara-ba tə nə jɛn Yu nətɔ. Mánjá mama, à nə wulə à lòrì Yu, ku nə yì titin nə à yèé yɪcaɔ, à yàá lòrì Yu, à pɛn mú. ⁴ À líí à tìàn də, n nə kwi nətɔ, à viru tə mánjá wa. Yá à dǎn yà swə zənzən, sə à pǐí à na mú, sə à pùé poli. ⁵ À yàá buɲa nətɔ tə, n nə ken n waa Zwezi nə wuuu. Ku təntən ku ya n nu Loyisə nə ken ɔ waa ɔ nə. Ku zàn lá, ku pa n nuu Enisə. Yá à dǎn yèé də, n də ken n waa ɔ mò Zwezi tə nə wuuu, n ga tà níé bələ tíú.

⁶ Mə ku mò nə pɛn, à ma líí mú yoo ku tə. Ja Yu tarpiɔn tə, ɔ nə pɛn mú, sə n ma tun zəni. Mánjá tə wa, à nə tún à jìàn tə n yuu wa, Yu pɛn mú tarpiɔn təntə. Kə n diàn lá n tun də ku tarpiɔn təntə. ⁷ Yu-*Siɲu yàá ba pɛn, liù jì yáá ɲwìán tíú. Ku mò nə pɛn, dàn ká pa, n ya yáá ɲwìán tíú. Ku yàá pa nəba diàn, sə nə ma tun, nə pa Yu nə. Ku yàá pa nə sóní là, ku ga pɛn, nə yèé nə tìàn janɔ.

⁸ Dàn ká pa cavira ja mú, sə n swìn nə *Yuu-Tiu yoo n biri là nə. Dàn ká pa cavira ja mú, à mò Polə nə wulə bán diè Zwezi-Kərisə yurì də. N də mɛ,

sə n də càn suywángú tə yiri, ndə à nə, də diàn tə, Yu nə pin mú. ⁹ U mù Yu nə jon nəba nə cuna wa. U kúrí nəba, sə nə ya v mù lià. Ku tà nə tutunzəŋə yiri, ku ya v tətə nə swə ku nətə, ku twá də v pubwanu tə nə. Yu tətə nə sóní, sə v fwa ku nətə tə, də luu tə wà fwa. Yu tətə nə twá də Zwezi-Kərisə, v ma tun v pubwanu tə nə yira. ¹⁰ Zwezi-Kərisə jon nəba nə cuna wa, yá v zwè tian diàn. Ku mù nə pin, síún nə, Yu pubwanu təntə dān yi nəpon.

Zwezi twá suywángú tə nə, v biri də, lià tə wá na mu, ku nə ba zwè Yu con.

¹¹ Yu tún nə, sə à ya v tuntunu, à swìn suywángú təntə, də à kàri ku à biri lià nə. ¹² Mə ku mù yiri nə, à də càn tə tə, yá cavira ba nə jə. À mù yèé liù tə, à nə kəni à waa v nə. Yá à yèé də, suywángú təntə, Zwezi nə pin nə, v wàá ku nə v cì, ku ja vələ dun tə, v nə wá pìi v bà.

¹³ Twá cígá sùràn tə nə, n nə nì à nii wa də, à swìn, sə n də sùràn ya ndə tə nə. Dān ká lwān won mama tə wa. N nə swìn tə sùràn təntə, Zwezi-Kərisə nə pin, sə n kə n waa v nə, yá n ga sóní lià də. Ku mù yiri nə, ja tə sùràn təntə n bican wa. ¹⁴ Ywān suywángú tə yuu, Yu nə pin mú. Ywān ku yuu də Yu-*Siŋu tə, ku nə wulə də nəba.

¹⁵ N yèé də, Kərisə lià tə mama, ba nə wulə Azi nagwanaa tə wa, viga nə ba dugv. Fizwelə də Ɛrəmozwenə twá ba wulə ba wa. ¹⁶ À lòrì nə Yuu-Tiu, sə v dəri Oneziforə mù, də v diè lià yinəgə zənzən. U mù yàá zùrì à bican, v ga ba à cavira dəri, də ba nə vwə nə də banzala tə. ¹⁷ U nə twi *Romə wa yəbə, v bɪbari v pìà bwálí tə, à nə wulə wuuu, halı v bà v na nə. ¹⁸ Nə Yuu-Tiu nə wá dəri v yinəgə zənzən, dun tə nə, v nə wá pìi v bà, v buri ləzoni bura. N mù yèé tètùnán tə, v nə tun v pa nə, mánjá tə wa, à nə yin Efezə nə, zəni.

2

Ka twá Zwezi-Kərisə nə də waa nədu yoo

(1 Koréntə tián 9.24-25, Matia 10.32-33)

¹ N mù Timote yi ndə à mù Polə biú nə. Zwezi-Kərisə fwa v pubwanu tə n yura. Ku mù nə pɪn, n dàń pa n jìàn dàn. ² N nì Yu sugu tə à nii nə, à nə swìn lià zənzən yáá con. Tì ku sugu təntə, n ma kàrì lià tə duən tə, ba nə yi pùé nədɔ tián. Ku tián təntə də kùb mə, sə ba wàní ba tì ku, ba ma kàrì lià duən də.

³ Də n nə tuŋa, n pɪn Zwezi-Kərisə nə, sə n sè n dé càn, ndə pamanu nəzəŋu nə sè, v dé càn nətu. ⁴ Liù nə vəli pamanɪ, v nə pìà, sə v poli v yuu tíú tə pùé nə, v kùb wà mə, sə v fwa yìèn tə, pamanu nə wà mə, sə v fwa. ⁵ Ku yi ndə liù nə wulə v dəri, v mù də lià duən, sə ba jon ŋwírán. U nə wà nətu ba nə mə sə ba dəri dəru tə nii nə twá, v wàrì dun yupuu v nɪ ku wa. ⁶ Ku tə yi ndə liù nə, v nə ken v diàn lá, v ma varɪ kára. Mə v mù nə wá yà təntən liù tə, v nə dí yáá v na v tori kára tə cu, mánjá wa. ⁷ Bún sùràn tə tə yoo, à nə swìn n con. N nə buŋa tə yoo, *Yuu-Tiu wá pa, n nì tə mama dèń.

⁸ Lìi Zwezi-Kərisə yoo, v nə tɪga, v pìi v bwin v nan tian wa. Ba lɪrɪ wá pìú *Davidə dwíí tə wa. Mə ku mù nə yi suywánú tə, à nə swìn, à bɪrɪ lià tə nə. ⁹ Ku suywánú təntə, à nə swìn, tə nə pɪn, à wulə banzala tə wa, à dé càn, ndə à fwa yolwan. Yá də ku nətu tə mama, ba tə wà Yu sugu tə ken bən diè. ¹⁰ Ku mù nə pɪn, à sè, sə à dé càn, lià tə yurɪ Yu nə kúrí, sə v twá Zwezi-Kərisə, v ma jon ba ba cuna wa, ba ga zu v dun tə wa, tə nə ba zwè.

¹¹ Nèń, sùràn tə, tə nə ba tútùná jə. Tə mù nə yi də, nə nə twá

Zwezi-Kərisə nə, nə tɪ, nə wá twá v nə, nə pìi nə bwin nə nan də. ¹² Də nə nə jɪn pínú wuuu, nə wà pìi nə kə nə kwa, nə wá dé pàrì də wá. Yá nə dàń nə vɪga wá, v də wá vɪ nəba. ¹³ U yi pùé nədɔ tíú. Ku mù nə pɪn də, nə nə swə nə bà nə jì pwíí bələ tián də, v mù tə yi pùé nədɔ tíú, v wàrì v tiàn v pìi v tən.

Tùtùnnò nàzəŋu yoo

(1 Timote 1.3-7, 18-20, Zwakə 5.19-20)

¹⁴ Lii yoo ku tə là tə mama, caga ba nii nə Yu yáá con, ba dân ká fwa jara yìèn yira boŋu yuu wa. Tə mù jara təntə ba won fwa tə pɪn ba, də ku nə tà, sə tə cùgè là tə, ba nə cuga tə. ¹⁵ N mù Timote, kə n diàn lá, sə n ya liù tə, n nə twá Yu puswənə nə. N me, sə n ya tutunu tə, n nə tuŋa zəni, n tutuŋi tə cavira dân ká ja mú. Ku me, sə n swìn Yu sugu tə, ku nə yi cígá tə, n biri là nə zəni zəni. ¹⁶ Dân ká kə n nii ləyirən yomanan tə wa, tə nə tà Yu nyiən. Là tə, ba nə jə yomanan təntə, yáá pìi mancun mancun, ba zu tutunkukwinan tə, Yu nə ba pià. ¹⁷ Ba mù là təntə kàrà yi ndə naworu nə, ku nə wórí ku zwɪ wuuu. Mə Yimene də Filetə wulə ba mù là təntə wa. ¹⁸ Ba mù kùb ba cígá tə nə twá. Ba mù swìn də, Yu manwarɪ v pìi v bwin là v li tian wa. Ba twá ku nətɪ tə nə, ba ma gɪgarɪ là tə, ba nə kəni ba waa Zwezi nə wuuu ba dɔga. ¹⁹ Də ku nətɪ tə mama, ku tə Yu mù nə tún, ku ba lwàní. Ku yi ndə ba nə tún diè dəkuu nə, ba púpúní sùràn tə tə ka dəkuu tə yuu wa. Tə sùràn tə swìn, tə wó: «*Yuu-Tiu yèə là tə, ba nə yi v mù nə ti.» Púpúná tə duən də swìn, tə wó: «Liù tə mama, v nə biri də, v ya *Yuu-Tiu nə ti, ku tíú dân me, sə v yá kunkun yìèn fàŋú nə.» ²⁰ N nə zua jɪjə tíú diè wa, n wá na zila yirə yirə tə nə wulə lá. Zila təntə duən yi síán wùrú zwun, nə à yèə lugu wùrú zwun. Tə duən də yi dɔ̀ ba nə sárí, nə à yèə tɪran nə ba ma fwa tə. Tə mù zila təntə mama tùtùnnán tà nədu. Zila tə nə ziən nə, ba ma tuŋa càna dun nə. Tə duən tə mù ya, ba ma tuŋa dun mama. ²¹ Mə nə yi nətɪ. Də liù nə cìgà v tiàn nə də yolwan tə mama, à nə swìn tə yoo, v yi ndə wùrú zuŋa tə nə, ba nə ma tuŋa càna dun nə. Yuu-Tiu wá li wá v tún vən nə, sə v ya v mù nyiən. U tutuŋi ziən ku pa Yuu-Tiu nə, v ga sè, v tuŋa tutunzəŋu yiri mama. ²² Cɪ n tiàn nə dân ká twá fwa yokukwinan tə, ləzwəndun tə nə swə, tə fàŋú. Kə n diàn lá, n

pìà ku tə, ku nə yɪ cígá yoo, də n waa mama. Kə n waa mama Zwezi nə wuuu, sə n sóní làà. Pa n mù də làà tə, ba nə jùnì nə Yuu-Tiu də bican nəpon tə, ya duən nə də bican sié. ²³ Làà nə wulə ba dɪ ləyəri tútùná, tə nə yɪ tutu, dân ká kə n nii lá. N yèé də, tə mù nə pɪn, làà tə fwa jara də duən. ²⁴ Ku wà mɛ, sə Yuu-Tiu tutunv dɪ jara. U mɛ, sə v zílí làà tə mama, sə v ya liù tə, v nə wàá v kàrì, sə v ga ja pínú də ba. ²⁵ U mɛ, sə v ja bɪcabwanv, v ma bɪrɪ làà tə, ba nə zɪga v nə. Ku wàá ku pɪn, Yu twá ku nə, v pɪn ba vəvəri ba kwa, ba ma sé ba cuna. Yá ba ga lwarɪ cígá sugu tə. ²⁶ Ku wàá ku pɪn ba pubuɲa pìí, ka twi cígá sugu tə nə, ba ga jon ba tiàn *Sítana jiàn wa, v yà nə jɪn ba ndə nyali, nə jɪn won nətu, v pa, ba tuɲa ku tə, v nə swə.

3

Luv zaɲv mánjá yoo

(2 Piyerə 2.1-22, Zwidə 3, Titə 1.10-16)

¹ Lìí n tiàn də yoo, ku tə zəni. Ku mù nə yɪ, luv zaɲv mánjá tə nə wá yà càn zənzən tə. ² Làà tə wá sóní ba tiàn cɪcɪ. Ba wá sóní səbiu, ba ga wá yà làà tə, ba nə swə yɪrɪ. Ba wá yà fwɪə làà, ba ga wá twɪn Yu. Ba wá vɪ ba nyɪna-ba nii, ba ga wá yà yəri jwɪan làà. Ba wá yà làà tə, ba nə ba Yu yìèn tə zílí. ³ Ba wá yà làà tə, ba yoo nə dà zənzən, ba ga ba ləzoni yinəgə dəri. Ba wá yà làà tə, ba nə dé tɪjaɲa làà dèñ nə, ba ga wá sóní jara. Ba wá yà làà tə, ba nə yɪ ndə ganaɲa nə, ba ga bá sóní won tə, ku nə zìən. ⁴ Ba wá yà làà tə, ba nə gɪgarɪ làà ba dɪga, ba ga wá yà làà tə, ba nə súé də lɪɲa. Ba wá yà fwɪə làà zənzən, ba ga wá sóní ba fɪra yìèn, ba doni Yu. ⁵ Ba wá fwa ndə Yu làà nə. Yá ba ga ba sè, sə Yu diàn tə lwàn ba, sə ba ya v mù Yu làà cígá cígá. N mù Timote, pa n mù də ba làà təntə, ya yɪɲunɪ də duən.

⁶ Ba mù làà təntə yiri nə sègè ba zwɪ làà dɪi wa, ba gɪgarɪ kana tə, ba nə ba

dìàn jə Zwezi-Kərisə cwəŋə tə wa, ba pɪn ba sɛ ba sùràn. Kana tɛntə yuu cuna dáá zənzən ba yuu wa, ba ga yɪ ba twá ku tə mama nə, ku nə ywán ku pa ba. ⁷ Ba yɪ kana tə, ba nə yàá swə, sə ba nì yoo mama. Yá ba ga wàrì cígá yoo mù, ba lwarɪ míámíán. ⁸ Nətu tə, Zwanəsə*f1* də Zwanbərəsə nə zɪgɪ *Moyizə nə, mə nətu bara tɛntə də zɪga cígá sugu tə nə. Ba yɪ là tə, ba pubuŋa nə ba tuŋa, ba ga wà ba waa ken Zwezi nə cígá cígá. ⁹ Là tə mama wá lwarɪ də, ba ya ləyərən, ndə là nə lwarɪ də, Zwanəsə də Zwanbərəsə yɪ ləyirən nətu. Ku mù nə pɪn, ba bá wàní ba va yáá.

Talíkwa kwìè tə, Timote nə mɛ, sə n twá tə nə

(2 Korɛntə tiàn 6.3-10, 1 Piyərə 1.19-21)

¹⁰ N mù Timote, n mù twá à mù Polə nə yìèn tə tə wa: N yèé nətu, à nə kàrì. N yèé ku tə, à nə yɪ. N yèé, à nə buŋa, sə à fwa nətu. N yèé, à nə kəni à waa Zwezi nə nətu. N yèé, à pínú nə mɛ nətu. N yèé, à nə swə là nətu. N yèé, à nə jɪn pínú wuuu, à dàn ká pìí à kə à kwa nətu, à ma twá Yu nə. ¹¹ N nɪ càn tə, à nə dí də wuwalu tə, ku nə yí nə. N yèé yìèn tə mama, tə nə yí nə Pisidi Antuswə nə, Yikoniomə nə, Lisətərə nə. Yá *Yuu-Tiu tə jon nə tə mama wa. ¹² Là tə mama, ba nə pìà, ba tì Zwezi-Kərisə cwəŋə tə cígá cígá, ndə Yu nə pìà nətu, ba wá dɛ càn là duən jìàn wa. ¹³ Yá là tə mù, ba nə yɪ wulunyina, ba nə gɪgarɪ là ba dɔga, ba mù wá kwen ba cùgà, ba sùrí wuuu. Ba wá gɪgarɪ là duən ba dɔgu, ba ga wá gɪgarɪ ba də ba dɔgu.

¹⁴ N mù Timote, vwa n tiàn kankan yìèn tə nə, ba nə ma kwè mú, n ga pa cígá mama tə nə. N yèé liù tə də, ɔ nə bɪrɪ mú tə yìèn tɛntə. ¹⁵ Vwa n tiàn kankan tə yìèn tə nə. N yəni Yu sagɪ tə də, n tə yɪ bisɪmaa. Ku mù Yu sagɪ tɛntə wàá mú yənu ku pɪn. Ku mù yənu tɛntə nə wàá mú ku bɪrɪ nətu Yu nə jon mú n cuna wa, n nə kəni n waa Zwezi-Kərisə nə wuuu tə yɪrɪ. ¹⁶ Yìèn tə mama, ba nə púpúní Yu sagɪ tə wa, ku ya Yu-*Sɪŋu tə nə pɪn, ba púpúní tə. Tə zìən, sə ba ja tə ba kàrì là. Tə mù nə wàá là tə bɪrɪ də, ba ba cígá

jə. Tə m̀ nə yàá caga là nì nə də, ba nə fwa yolwan. Tə m̀ nə buri, nətɔ
là nə mɛ, sə ba ya cígá wa. ¹⁷ Yu-Siŋu tə fwa ku nətɔ tə, sə ku pa Yu liù
wàní v m̀ ka fwa yozəŋə mama.

4

(Tutunan 20.28-31, 2 Timote 2.3-7)

¹ Dun don nə, Zwezi-*Kərisə wá pìí v bà. U wá bà ndə pìú nə. U wá b̀r̀ tɔga tə bura, v ga b̀r̀ ba tə, ba nə wà tɔ, də bura. À m̀ Polə dān pɔn nìi ku
tə n m̀ Timote nə, Yu yáá con də Zwezi-Kərisə yáá con. ² Swìn suywáŋú
tə, n buri! Swìn ku də n bwé! Máná tə nə zìən, sə n swìn ku. Ka nə kùb ba
zìən də, sə n tə swìn ku. Buri là tə, ba nə tɔŋa lwanı tə, də ba ba cígá jə, n
ga caga ba nìi nə. Kwè ba, sə ba fwa ku tə, ku nə zìən. Ja pínú dun mama,
n ma kàr̀ ba nətɔ. ³ Máná don wá bà, là tə nə kùb bá cɔgu ba tə, ba nə
kàr̀ cígá s̀r̀àn tə ba buri, ba nə pìà, sə ba tun yokukwınan tə yırı. Ba wá
pè karnyına duən, ba ma kıkarı ba tìàn, sə ba kàr̀ ba yìèn tə, ba nə swə.
⁴ Ba kùb bá cɔgu cígá s̀r̀àn tə, ba dān wá pìí, ba cɔga kunkun yomanan.
⁵ N m̀ Timote, n mɛ, sə n ya liù tə, n nə yèé yoo dèń, máná mama, wuuu.
Sè, sə n d́ càn tə, sə n swìn suywáŋú tə n buri là nə. Tun tutɔŋı tə, Yu nə
pɔn mú, n pa ku nìi sú.

(Filipə tìàn 1.20-23, 1 Timote 1.19-20, Matìə 10.18-20)

⁶ À m̀ Polə yɔ ndə vanı nə, ba nə tanı, sə ba ma fwa *jɔŋi. Ku pìà ku buri
də, à máná yí, sə à va Yu con. ⁷ À ta Zwezi-Kərisə yırı zənzən. À zwè ku tə,
Yu nə pɔn nə, sə à fwa, ndə liù nə dəri v va v yí bwálí tə, v nə mɛ, sə v yí
lá. À ken à waa Zwezi nə wuuu, à wà pìí à kə à kwa. ⁸ Síún nə, à yèé də,
Yu tún à ŋwírán v con, tə nə dānı nə. Nə Yuu-Tiu nə wá b̀r̀ nə bura dun
don nə. Ku dun tə nə, v wá pa nə cígá tíú yupuu tə. Ku tà à cıci nə, v wá
pa ku, v wá pa ku là tə mama nə, ba nə swə, sə v pìí v bà.

Polə boŋə Timote, sə v bà v con

⁹ Timote, kə diàn, n bà n yí nə lala! ¹⁰ Demasə vɪga nə v dugu, síún luv ku tə wiən fura nə jə wá yırı. Yá v dàñ vəli Tesalonikə. Kəresansə də vəli Galasi, Titə də ga va Daləmasi. ¹¹ Likə cici nə wulə à con. Mánjá tə wa, n nə biàn, sə n ja Marəkə, n ja kə lá n bà. U wàá à nə v saŋa. ¹² Tiswikə mù ya à mù nə tun wá Efezə nə. ¹³ Mánjá tə, n nə biàn, sə n twá Karəpisə con Tərowasə nə, n jon à gànù, à vîi à yá lá, n ja bà n pa nə. N nə biàn, sə n kə lá n ja saga tə n bà. Ku tə, ku nə dwə à yà swə, sə n ja tə tə, ba nə púpúní tanan tə wa, n ja bà.

¹⁴ Alekəzandərə, v nə yɪ yarv, tun yolwan nəfarv à yıra. Nə *Yuu-Tiu nə wá ŋwín ku tə, v nə tun, tə ŋwírán v pa wá. ¹⁵ Cɪ n tiàn nə də wá, v cìgà nə kàrà tə yáá nə də diàn.

¹⁶ À nə təntən à tún à nii là tə, ba nə buri bura, tə yáá con, liù mama wà v nii ken à kwa. Ba mama vɪga nə ba dugu. Yu nə wá kwən ba cuna, v li ba mù də wá pwéré wa. ¹⁷ Də ku nətv me Yuu-Tiu tə wà nə vɪ v dugu. U mù nə pun nə diàn, à ma wàní à swìn v sugu tə mama, à buri ndə ku nə me nətv. Là tə mama, ba nə tà *Zwifə-ba, nì ku. Yuu-Tiu nə san nə, à ma wàní à jon à tiàn tian jun wa. ¹⁸ Yuu-Tiu nə wá cì à nə də yolwan mama, v ga wá jon nə, v pa à zv v nyina Yu *sàñ tə wa. U mù nə me də dun dun mama wuuu. Amuna!

Sagi tə yígúré jùná

¹⁹ Jun Pərisəka də Akilasə n pa nə. Jun Oneziforə də v diè là tə n pa nə. ²⁰ Erasətə wulə Korentə nə. Tərofimə mù yıra ba zurə, à ma yá wá Mile nə. ²¹ Kə diàn, sə n bà də waran tə mánjá tə wà yí. Bilisə də Pidansə də Linisə də Kəlodia də là tə duən tə mama, ba nə yɪ n nubɪa *Kərisə yırı tə, jùná mú. ²² *Yuu-Tiu nə wá yà də mú. U wá fwa v pubwanv tə á yıra. Amuna!